

杭州府志
(乾隆)
八

杭州府志卷二十九

古蹟一

故城故宅地望所儲桑經酈注取法乎初陵谷雖變紀載弗
渝湖山有美忠孝連閣斯文系感陳迹備書國聞雅故其在
是歟志古蹟第十

府錢塘仁和附郭

古州城 隋於餘杭縣置杭州又自餘杭移州理錢塘又移州於

柳浦西今州城貞觀六年自州治南移今所去州十一里舊唐書地理志

吳越子城 錢氏築羅城周七十里城中又有子城有門曰朝天

門曰炭橋新門曰鹽橋門今並廢土人猶以門稱焉乾道志子城之

南為通越門北為雙門錢氏納土後二門猶存

吳越國治考

按乾隆志云吳越備史稱唐大順元年王命築新夾城環包

艮山暨秦望山周回凡五十里景福二年王率十三都兵泊

役徒新築羅城自秦望山由夾城東互江干洎錢塘湖霍山

范浦凡七十里乾道志所稱周七十里者應即景福二年所

築

宋禁城

在鳳凰山東以臨安府舊治子城增築

乾道志

建炎三年

二月詔以州治為行宮紹興元年十一月詔守臣徐康國措置草

創二年九月南門成詔名曰行宮之門十八年名南門曰麗正北

門曰和甯東苑門曰東華二十八年增築又設西華東便二門其

城周回九里

行在所錄

按古州城吳越子城宋禁城包絡於今城內外而其郊廟諸壇以及營屯廂壁官署又於今城內外參錯互見茲俱列入府城以從其朔

吳越營屯

在國治凡六白璧營在城南上隅寶劍營在鍾公橋

北青字營在鹽橋東福州營在梅家橋東馬家營在修文坊大路

營在褚家塘

吳越國治考

德壽宮

紹興三十二年六月名新宮曰德壽

宋史高宗本紀

在望仙橋

東德壽宮德壽殿二扁皆孝宗書宮中疊石爲山象飛來峯有堂

曰冷泉有樓曰聚遠太上親題其額

咸淳志

宮門外有百官待漏院

乾道志

初為蔣院使花園紹興間望氣者以為有鬱葱之符秦檜專

國心利之請以為賜第其東偏即檜家廟則格天閣之故基檜卒

燿猶戀戀請以為第烜為光祿丞留隸家廟言者罷烜遷廟主于

建康遂空其室焉高宗倦勤即其地築宮曰德壽後又更曰重華

曰慈福曰慈壽凡四易名

錢塘遺事

按德壽宮即今宗陽宮西湖游覽志慈壽宮作壽慈

開元宮 在府城內泰和坊宋甯宗潛邸也嘉泰初詔改為開元

宮元時即宮之左為行中書省

大清一統志

至元二十八年省與宮並

燬因兼宮地作省時董得時主宮事購求故宋理宗端孝公主第

為宮在清湖橋西翰林學士虞集撰碑至治初民火延燎住持王

壽衍改作之江浙儒學副提舉陳旅撰記揭奚斯撰碑又爲清風堂撰記歐陽元爲後記學士張伯瀆撰介春堂記成化初剖遺址之半爲學射圃重建宮於其後

嘉靖仁志

開元宮圖一卷不著撰人元

泰定二年柳貫爲後序見柳待制集

清波三志

按嘉靖志云宋開元宮自泰和坊遷至清湖橋西之時其殿宇廊廡雖非昔日之盛要亦非今日之隘陋也據陳旅記外爲大門象二大神守之爲屋若干楹祠在門側者曰祠山曰斧壇在前殿北者曰明離殿又北曰道紀堂又北曰方丈丞相脫權題榜東西爲長廡在西廡者曰齋室在東廡者曰眞官祠登仙祠予武殿三官殿其棲賢者曰僚宇在東西廡間

曰庖福曰廩庫在東廡東曲池疏治之後圃者則仍其舊而加完焉此在元時者尙爾修整其在今日什無一二之存可勝歎哉

龍翔宮 在後市街理宗潛邸淳祐四年建道宮賜名龍翔以奉

感咸淳帝志寶祐癸丑臘月宮燬後雖復建終不如前元至元壬

午志燬住持胡元洪卜地於城西陬乃重建於德化坊卽楊和王祀神舊地曰清微靖基之所宋有三齋曰履和頤正全眞後住持黃石翁續立七齋曰宜修觀妙東明環隱中和守正安晚元統癸酉復燬住持史景任重建儒學提舉楊維楨撰碑葉廣居爲記方丈後有小蓬山江浙副提舉陳旅記張氏據杭占爲軍器局丙午

十一月杭城款附住持毛繼祖請於總兵官復之

嘉靖仁志葉
廣居重建龍翔

宮碑記杭之龍翔宮者龍虎山正一教主嗣漢天師張君世所治也初在宋理宗以沂王之嗣入續帝位瀆祐甲辰闕旅邸為老氏之宮別作南真觀以居學仙之士宮初在杭之後市街元至元壬午遷於杭州之西北取楊和王清徽靖基故址大德丁卯古泉胡元洪重營之而宮宇加大三十四代天師立觀妙齋元統癸酉燬於鄰火三十六代景任亦出私金附益之規制逾宏麗矣中為大殿以奉三清前為修門以肅神衛作天師祠曰真風立鐘樓曰和應又館祐聖殿於左掖里域之壇祠山之位列於兩序建法堂以講授翼兩廡以棲居揭八齋之扁曰履和曰熙正曰全真因其舊也曰宜休曰東明曰環隱曰中和曰守正紀其績也庾庖胥完食息有所後為方丈疊石鑿池時藝卉木婆娑鬱象海山仙島小蓬山翰林應奉陳旅為之記觚稜聯雲窗戶霏烟丹碧煌煜邃密清疏西湖匯其右吳山拱其左市廛不驚清風自至褒衣危冠相與論道談元真世外之高居也宮之建逾百年重建未有記無垂不朽請文勒石惟世之有元學尙矣自河上安期毛翁蓋公以黃帝老子之言相教授漢祖公卿大夫頗以清淨之學資輔世治已而禱祠上帝貴神之說興而神奇之事益彰正一靖應真君之教興子孫繼繼繩繩歷晉迨宋至于今日錫之爵位榮顯崇極世

澤久而彌著。瞻聖賢不作而堯舜周孔之道微。有能演長無爲之化。持一編爲帝者師。以躋民于壽域。則世其庶幾乎。又聞俊傑村德君子多託是以棲息。吾所以日望于星弁霞裾者。而龍翔宮記所由作也。

宋郊廟 紹興四年詔祀明堂作行禮殿於教場五年建太廟於

臨安十三年築園丘

宋史高宗本紀

郊丘在嘉會門外南四里龍華寺西

壇四城分十三陛陛七十二級青城齋宮及望祭殿以幕屋爲之

大殿曰端誠便殿曰熙成外爲泰禋門明堂卽文德殿紹興四年

親灑御墨書明堂及明堂之門六字太廟在瑞石山左正殿七楹

分十三室太祖太宗眞宗仁宗英宗神宗哲宗徽宗欽宗高宗孝

宗光宗甯宗諸室之西奉僖順翼宣四祖廟有冊寶殿齋殿致齋

閣子

咸淳志

宋景靈宮 在新莊橋之西中興初四孟朝獻皆于禁中行禮紹興十三年臣僚言景靈宮以奉祖宗衣冠之游卽漢原廟也今就便朝設位未副廣孝之意遂詔臨安府同修內司相度修蓋中殿後二十一年廣增前殿自東齋殿西循廊而右爲大堂三楹臨池上左爲明樓旁有蟠桃亭堂之南爲西齋殿西爲流杯亭跨水亭梅亭北爲并堂又有橘園及桂竹各一區餘雜四時花果亭宇不能備載

咸淳志

宋諸壇 紹興十六年饗先農于東郊築高禘壇十八年築九宮

貴神壇于東郊

建炎以來朝野雜記

太社太稷壇在觀橋東北先農壇高禘

壇並在嘉會門外南四里九宮貴神壇在東青門外一里海神壇

在東青門外太平橋東臨安府社稷壇在小昭慶寺側

咸淳志

宋官署 學士院在和甯門內三省樞密院在和甯門內北都堂

在樞密院中書門下後省在都堂西檢正左右司在諫院右承旨

檢詳編修中樞密院三省樞密院架閣在制敕院後御史臺在清

河坊諫院在後省之內六部並在樞密院南六部架閣在天水院

橋太常寺在羅漢洞玉牒所宗正寺在太廟南太理寺在仁和縣

西司農寺太府寺並在保民坊內秘書省在天井坊之左國史院

在秘書省右文殿東敕令所在侍郎橋南國子監在紀家橋將作

監軍器監並在保民坊大宗正司在天慶坊茶鹽所會子所公田

所封樁所安邊所並在三省大門內登聞鼓院登聞檢院並在麗

正門外左右闕之南都進奏院在朝天門外官告院在部門內諸
司諸軍糧科院在漾沙坑審計司在保民坊權貨務都茶場雜買
務雜賣務在通江橋東文思院在北橋之東車輅院在嘉會門外
御前軍器所在禮部貢院西騏驎院在漾沙坑左藏庫在清湖橋
西宗學在睦親坊太學在前洋街武學在太學東禮部貢院在觀
橋西別試所在大理寺西太史局在吳山太醫局在通江橋北

行在

所錄

宋營屯 中興初諸將各總重兵至紹興三年詔三衙措置營屯

次第皆東都衛兵之遺也

建炎以來
朝野雜記

殿前司衙在鳳凰山下麗正

門之右舊司有捧日天武拱聖驍騎甯朔廣勇六指揮額管二千

人紹興創置諸軍額管七萬三千人又分隸外郡一萬五千不在
此數選鋒馬軍一寨在太平橋西選鋒軍四寨在艮山門外策選
鋒馬軍四寨在羊坊橋及昭慶寺側策選鋒步軍六寨在褚家塘
及後洋街磚街巷斜橋前軍馬軍一寨在螺螄橋東前軍步軍二
寨在東青門外右軍馬步軍一寨在茶漕巡檢司北右軍三寨在
長明寺羅漢寺中軍旁步軍六寨在皇城周廻及七寶山錢湖門
內外護聖馬軍四寨在北關門外及新門外四板橋護聖步軍七
寨在候潮門外欄木橋盛家衙等處游奕馬軍一寨在端平橋東
游奕步軍五寨在崇新門外以北神勇馬軍二寨在北關門外新
街及西馬塍神勇步軍二寨在湖墅米市橋一帶左軍馬軍三寨

在高麗寺前法雨寺側長耳巷左軍步軍三寨在麥嶺及行宮橋
後軍馬軍二寨在無星橋北後軍步軍四寨在褚家塘及梅家橋
艮山門裏寶祐二年創招浙江水軍咸淳四年增招以一萬爲額
其十寨在龍山及螺螄太平端平無星等橋侍衛馬軍司衙舊在
保民坊有龍衛雲騎武騎三指揮額管一千人今步司帥兼領又
軍額三萬人乾道七年移屯建康侍衛步軍司衛在鐵冶嶺舊司
有神衛左虎翼右虎翼床子弩廂軍御營喝探七指揮額管四千
六百人紹興初置諸軍額管二萬三千人前軍馬軍一寨在黃泥
嶺前軍步軍二寨在麩院及獨角門右軍馬軍二寨在大小麥嶺
右軍步軍二寨在西湖旌德觀後右軍潛火二寨在三茅觀後及

萬松嶺中軍馬軍四寨在西溪方井一帶中軍步軍二寨在湖墅
中軍在城將二寨在錢湖門裏左軍馬軍一寨在兒門鋪左軍步
軍二寨在錢糧司嶺及雙塔兒門前左軍在城將一寨在錢湖門
裏白鱸潭後軍馬步軍一寨在錢糧司嶺下

咸淳志

宋廂壁 紹興十一年五月守臣兪侯奏請府城之外南北相距
三十里人烟繁甚各比一邑乞置城南北左右廂差親民資序京
朝官主管本廂公事杖六十以下聽決又乾道三年四月臣僚奏
請城東西警邏稀疏乞置巡檢司二員措置盜賊從之城南左廂
公事所在嘉會門外洋洋橋城北右廂公事所在餘杭門外江漲
橋城東廂都巡檢使司在崇新門外城西廂都巡檢使司在錢糧

司嶺紹定四年安撫余天錫請于殿步兩司各差官兵千人於城內置隅分東西南北四壁各管其一殿司差統制二員兼任本府兵馬鈐轄步司差統制二員兼任浙西兵馬副都監分隅任責東將在軍頭司北西將在三茅觀後南將北將並在東青門裏淳祐四年安撫趙與憲請就殿步司營寨在城外四壁者各選軍兵三百人各差統制官帶本府鈐轄路分職事分任防虞之責並照城內四壁約束仍隸本府節制東壁在東青門外西壁在黃泥嶺南壁在候潮門外北壁在餘杭門外

咸淳志

錢塘縣舊治 舊在錢塘門裏三十步今景靈宮車馬門裏是也

去本州舊治九里後徙于紀家橋西北以華嚴寺故基建去府治